

## MAJLIS PERWAKILAN PELAJAR SESI 2008/2009

### Universiti Malaysia Perlis Dimenangi Tanpa Bertanding

Oleh : Nyak Madzura Md. Fazilah

Majlis Perwakilan Pelajar Universiti Malaysia Perlis Sesi 2007/2008 dalam pemilihan Majlis Perwakilan Pelajar (MPP) pada 13 Oktober 2008 telah secara rasmi dimenangi tanpa pertandingan berikutan bilangan pencalonan yang diterima tidak melebihi kerusi yang dipertandingkan. Pada 24 September 2008 (Rabu), Majlis Perwakilan Pelajar Sesi 2007/2008 dengan rasminya telah dibubarkan.

Sehubungan dengan itu, satu Jawatankuasa Pemilihan Majlis Perwakilan Pelajar (MPP) Universiti Malaysia Perlis telah ditubuhkan untuk mengadakan pemilihan bagi memilih Ahli Majlis Perwakilan Pelajar Sesi 2008/2009. Konstituensi yang dipertandingkan adalah termasuk 19 kerusi konstituensi bagi pusat pengajian, 2 kerusi konstituensi diploma dan 7 kerusi konstituensi umum yang menjadikan jumlahnya sebanyak 28 kerusi.

Proses pemilihan bermula dengan pengambilan borang penamaan calon yang dikeluarkan oleh urusetia pemilihan MPP di Jabatan Hal Ehwal Pelajar & Alumni pada 08 hingga 10 Oktober 2008 bermula dari jam 9.30 pagi hingga 4.00 petang. Pihak urusetia turut memaparkan prosedur pengisian borang penamaan calon dan syarat-syarat penamaan calon di pusat pengambilan. Dalam masa yang sama persiapan menghadapi hari penamaan calon turut diberi perhatian. Antaranya termasuk persiapan tempat, senarai semakan dokumen pencalonan dan dokumen-dokumen yang berkaitan dengan pendaftaran penamaan calon.

Proses penamaan calon pada 13 Oktober 2008 (Isnin) yang berpusat di Jabatan Hal Ehwal Pelajar & Alumni berjalan dengan lancar. Setelah berakhirnya tempoh masa penamaan calon, jumlah keseluruhan calon yang menghantar borang penamaan adalah seramai 28 orang mengikut jumlah kerusi yang dipertandingkan. Di sebelah tengahari paparan senarai nama calon untuk perhatian umum dikeluarkan. Tiada bantahan dari mana-mana individu dalam tempoh bantahan yang telah ditetapkan dan tiada penarikan diri dari mana-mana calon yang mendaftar.

Secara keseluruhannya proses penamaan calon pemilihan Majlis Perwakilan Pelajar bagi Sesi 2008/2009 Universiti Malaysia Perlis berjalan dengan lancar tanpa sebarang kejadian yang tidak diingini. Calon-calon yang menang di dalam pemilihan ini akan dilantik sebagai ahli-ahli exco MPP bagi Sesi 2008/2009.

